

Lungzswng: "Ciet Ngaizbya" Angqhoh Fungsou

Ndwen 10 ngoenz 10, Lungzswng Gak Cuz Swciyen Byauzlij Cin banh "ciet ngaizbya" bi gvaq baez haenx, vunzlai minzcuz vunznoix dangdieg haiguh doengh gij hozdung "lwgsau Byauzlij dauq ranzmeh" gingq boux-geq, yienj dinfwngz ciuhgeq gaemh bya, cuengq baenz fanh duz byalwg, gwn ngaizhumx daengj lai cungj lai yiengh neix, angqhoh fungsou, rox-nyinh seizdaih moq ndwen-ngoenz gyaunde, hozdung yinx ndaej baenz fanh boux-hek caeuq vunzlai henzgyawj daeuj yawjgonz.

(Vuz Swngbinh Vuz Cencen Siz Meizlanz/吴生斌 吴倩茜 石梅兰)



▲ Vunzlai dangdieg gingq laeujhom hawj bouxhek.



▲ Vunzlai haiguh "lwgsau dauq ranzmeh" gingq bouxgeq.



▲ Hozdung yienhciengz.

Nanzningz Swfhfan Dayoz Bouxcuengh Vwnzva Hezvei Hai Aenhoih Veiyenz Doxraen Caeuq Aen Yizsi Venjbaiz Bouxgagnyienh

Ndwen 10 ngoenz 10 banhaemh, Nanzningz Swfhfan Dayoz Bouxcuengh Vwnzva Hezvei youq laeuzciyenh gyausiz 405 gawjhengz aenhoih veiyenz doxraen caeuq aen yizsi venjbaiz bouxgagnyienh hozdung. Nanzningz Swfhfan Dayoz Codaengj Gyauyuz Yozyen fuyencangj Loz Yiyenz, Codaengj Gyauyuz Yozyen fujdaujyenz Lij Yinh, Veiz Vwnzbingz, Codaengj Gyauyuz Yozyen hagseng daibyauij caeuq 19 gaep veiyenz daibyauij camgya baez hozdung neix.

Baez hozdung neix gaisau gij ciznwngz guhhong aen hezvei neix hawj caezgya, hawj caezgya engq rox gij hong mizgven aen hezvei neix. Baez hozdung neix mboujdan miz ligliengh moq gyahaeu, lij ndaej haenqrengz fazyangz gij cingsaenz caeuq vwnzva Bouxcuengh.

Doeklaeng, Loz Yiyenz doiq baez hozdung neix guh cungjez, de naeuz gij youqgaenj lienzhaeh Bouxcuengh Vwnzva Hezvei aen hagdangz neix caeuq hagdangz wng; lij naeuz gij vwndiz seizneix miz haenx, genyi veiyenz aen hezvei neix wnggai "byaijok bae" lai yawjyawj, doengzseiz naeuz le gij genyi guhlawz bae cienziep ndei vwnzva Bouxcuengh.

(Cinz Meijgyah Sung Ciuhlinz Loz Yungj Cinz Yaujyinz Cinz Lingzyen /覃美嘉 宋秋霖 罗永 岑晓耘 陈灵燕)

Sanhgyangh: Youq Doenghnaz Doxdax Guhhong Angqhoh Gaiqgwn Sou Ndaej Lai

Ndwen 10 ngoenz 11, Sanhgyangh Dungcu Swciyen Fulenz banh aen hozdung mehmbwk bouxak doxdax sou haeuxnaz gaemh bya, 100 lai boux mehmbwk Mbanjdung youq doenghnaz faen cuj doxdax gaemh bya, riengjret fad haeuxnaz, angqhoh seizcou gaiqgwn sou ndaej lai. Geij bi neix daeuj, aen yienh neix doenggyaq dauq guh gij vunqsik dajindaem "ndaem haeux ciengx bya", guh-baenz dajindaem dajciengx doxgyonj "ndaw naz miz haeux, ndaw raemx miz bya, laj namh miz sae, ndaw naez miz byanouq, gwnz gumz miz gva", aeundaej gij cingzyauq "raemx ndeu song yungh, naz ndeu lai sou, gyalai yauqik, canjnieb banggunz", bangrengz vunzlai dangdieg doeng-gvaq hwngfat canjnieb saedyienh laisou vut gungz.

(Gunj Yicungh/滚亿忠)



▲ Beixnuengx Dungcu youq gyangnaz doxdax gaemh bya.

Yungzsuij: Beixnuengx Dungcu Langh-baij Gij Vwnzva Dungcu Lai Yiengh



▲ Geq iq caemh ciengq Godung.

Ndwen 10 ngoenz 13, Yungzsuij Myauzcuz Swciyen aen hozdung doxgyau gij vwnzva Dungcu youq Yungzsuij Cin Mung' vuh Mbanjmyauz banh, gyoengq beixnuengx Dungcu daj daengx yienh gak yanghein Mbanjdung daeuj haenx doxcomz caij din venz, yienj Heiqdung, ciengq Godung daengj, langhbaij gij vwnzva Dungcu fungfouq lai yiengh hawj vunzlai yawj, danqhaenh ndaej daengz dangj lingjdauj, hong banggunz lajmbanj cingq guh ndaej hoengh-hwdhwd, ndawbiengz onjdingh huzndei, gyoengqvunz ndwen-ngoenz vuenyungz.

(Liu Swjyenh/廖子渊)